

09 AUG 1999

Mahathir-Konspirasi

ANWAR TELAH LAMA RANCANG JATUHKAN PEMIMPIN LAIN, KATA MAHATHIR

MELAKA, 9 Ogos (Bernama) -- Perdana Menteri Datuk Seri Dr Mahathir Mohamad berkata Datuk Seri Anwar Ibrahim telah lama merancang untuk menjatuhkan pemimpin lain termasuk beliau, ketika bekas timbalannya itu masih dalam kerajaan.

Sambil menafikan bahawa Anwar mangsa mana-mana konspirasi seperti didakwa bekas timbalan perdana menteri itu, Dr Mahathir berkata: "Dia sebenarnya jadi perancang dalam usaha jatuhkan orang lain bukan dia yang jadi sasaran untuk dijatuhkan oleh sesiapa."

Beliau berkata pendedahan Anwar mengenai surat dan dokumen kerajaan yang disimpan di luar negeri membuktikan bahawa Anwar berniat menggunakannya bagi tujuan tertentu.

Anwar sekarang telah membuat kenyataan bahawa dia memiliki banyak surat dan dokumen kerajaan yang disimpan di luar negeri supaya dia boleh dedahkan kesalahan kerajaan satu persatu, katanya.

"Apakah maknanya ini, maknanya selama dia dalam kerajaan dia, tiada kerja lain melainkan mengutip surat-surat ini dan menyimpan untuk satu tujuan...ini bermakna dia yang punyai pakatan, dia punya rancangan untuk menjatuhkan sipolan dalam kerajaan termasuk saya, mungkin (Menteri Perdagangan Antarabangsa dan Industri) Datuk Seri Rafidah Aziz dan lain-lain," katanya.

Perdana Menteri yang mengadakan lawatan kerja dua hari ke Melaka berkata demikian semasa berucap pada majlis perjumpaan dengan pemimpin peringkat bahagian, pemuda dan wanita Barisan Nasional (BN) di sini hari ini.

Beliau berkata Anwar semasa berada dalam kerajaan, nampaknya bukan menjalankan tugas sebagai menteri kerajaan tetapi sebagai seorang yang berniat menjatuhkan pemimpin kerajaan.

"Dan untuk ini dia sanggup mengumpulkan surat-surat rahsia kerajaan," katanya.

Dr Mahathir berkata surat rahsia itu terikat dengan undang-undang rahsia dokumen kerajaan yang tertakluk di bawah Akta Rahsia Rasmi (OSA).

"Kita tidak boleh gunakan dokumen kerajaan untuk lain-lain perkara melainkan daripada yang ditentukan oleh kerajaan tetapi dia (Anwar) kumpul semua surat dan simpan di luar negara supaya boleh digunakan terhadap kerajaan," jelas beliau.

Dr Mahathir berkata adalah tidak mungkin Anwar baru mengumpulkan surat-surat itu selepas beliau didakwa di mahkamah kerana Anwar (semasa dipecat) hanya dibenarkan masuk ke pejabatnya mengambil barang peribadi.

"Pegawai-pegawai ada bersama selepas itu apabila dia masuk pejabat mengambil barang bagi memastikan beliau tidak mengambil dokumen kerajaan.

"Kalau dia memilikinya bermakna dia sudah simpan dokumen itu dan hantar ke luar negeri untuk disimpan dan diguna untuk ugut atau jatuhkan pemimpin kerajaan yang lain," kata Perdana Menteri.

Dr Mahathir bagaimanapun berkata tuduhan bahawa beliau dan rakan-rakan mengadakan satu konspirasi atau pakatan untuk jatuhkan Anwar masih dibangkitkan, termasuk dalam perjumpaan dengan para pemimpin Umno.

"Kalau kita buat pakatan, tidak boleh buat pakatan di waktu itu sahaja dan terus berjalan...hendak buat pakatan kena jumpa orang, ada mesyuarat rahsia kena bisik-bisik baru boleh buat pakatan."

"Kita tidak tahu langsung hingga saat akhir yang Datuk Seri Anwar akan disingkirkan dengan sebab tertentu," jelas beliau.

Dr Mahathir berkata beliau tidak pernah mengeluarkan apa-apa dokumen mengenai Anwar kerana beliau tidak menyimpan dokumen mengenai bekas timbalannya itu dan apa-apa dokumen yang ada sekarang didapati daripada polis.

"Dan sekarang kita tahu daripada dokumen yang masih ada dalam kerajaan bahawa banyaklah perkara yang dilakukan olehnya semasa menjadi menteri, yang sebenarnya menunjukkan dia tidak ikhlas dan jujur kepada pentadbiran...dialah yang amalkan kronisme dan nepotisme," kata Perdana Menteri.

Kawan-kawannya diberi kemudahan tertentu supaya mereka akan menyokongnya, katanya.

Dr Mahathir yang juga Presiden Umno, pada sebelah pagi selepas tiba di sini, telah menghadiri mesyuarat tertutup dengan badan perhubungan Umno negeri.

-- BERNAMA

MOZ RON